

आकाशवाणी

- सरकार आसेआ मंगां मन्नी लैने दे बाद काँक्रोच जनता पार्टी ने अपना आंदोलन वापस लेई लैता ऐ।
- धर्मेन्द्र प्रधान हुं'दे इस्तीफे दे बाद केन्द्री मंत्री प्रल्हाद जोशी होरें'गी नमां शिक्षा मंत्री बनाया गेआ ऐ।
- सरकार म्तेहानें च गड़बड़ियां रोकने सरबन्धी संशोधन बिल 2026 गी कल लोकसभा च पेश करग।
- प्रधसानमंत्री नरेन्द्र मोदी अज्ज दिनै 11 बजे अपने रेडियो कार्यक्रम मन की बात दे राहें देश-बदेश दे लोकें कन्नै बचार सांझे करडन।
- 1999 दी कारगिल जंग दे दरान देसै लेई सर्वोच्च बलिदान देने आहले दलेर भारती सैनिकें दे सम्मान च अज्ज कारगिल विजय दिवस मनाया जा'रदा ऐ।
- विश्व जूनियर स्कवाश चैंपियनशिप दे महिलाएं दे सिंगलस वर्ग दे फाईनल च जित हासल करने आहली अनाहत सिंह पैहली भारती खड्गारन बनी गेइयां न।
- भारती मर्दे दी सब-जूनियर टीम ने पाकिस्तान गी 3-1 कन्नै हराइयै एफ.आई.एच. यूथ हाकी एशियन चैंपियनशिप च सुन्ने दा तगमा हासल कीता ऐ।

<><><><><><>

CJP-Protest

सरकार दे कन्नै सैहमति बनने दे बाद काकरोच जनता पार्टी नै अपना आंदोलन वापस लेई लैता ऐ। नमीं दिल्ली च कल केंद्री मंत्री जे.पी नड्डा ते डाक्टर जीतेंद्र सिंह होरें सीजेपी डेलीगेशन दे कन्नै त्रिये दौर दी गल्लबात कीती।

बैठक च म्तेहान प्रणाली च सुधार ते पेपर लीक रोकने दे उपाएं पर तफसीली चर्चा कीती  
गेई। सांझो संवाददाता सम्मेलन च केंद्री मंत्री जे.पी नड्डा होरें दस्सेआ जे सरकार नै सीजेपी  
दिएं मंगें पर सैहमति जताई ऐ। उनें आखेआ जे प्रदर्शनकारिं खलाफ कोई कार्रवाई नेई कीती  
जाहग ते उंदे खलाफ कोई एफ.आई.आर ते उंदे खलाफ कोई एफ.आई.आर बी दर्ज नेई होग।  
जेगर कुसै प्रदर्शनकारी खलाफ पैहले शा एफ.आई.आर दर्ज ऐ तां उसी वापस लैता जाहग।  
नीट यू.जी पेपर लीक दे बाद आत्महत्या करने आले छात्रें दे परोआरें गी मुआवजें दे मुद्दे पर  
नड्डा होरें आखेआ जे सरकार दी पूरी संवेदना उंदे कन्नै ऐ।

<><><><><><>

Joshi New Education Minister

केंद्री मंत्री प्रहलाद जोशी होरें गी नमां शिक्षा मंत्री बनाया गेआ ऐ। उनेंगी उंदे मौजूदा विभागें  
दे कन्नोकन्नी शिक्षा मंत्रालय दी अतिरिक्त जिम्मेदारी सोंपी गेई ऐ। प्रहलाद जोशी फिलहाल  
उपभोक्ता मामले, खाद्य ते सार्वजनिक वितरण ते नमीं ते अक्षय उर्जा मंत्रालय दा कार्यभार  
संभाला'रदे हे। तोआई, राष्ट्रपति द्रौपदी मुर्मू होरें केंद्री मंत्री धर्मेंद्र प्रधान हुंदा केंद्री मंत्रिपरिषद  
शा इस्तीफा तुरत प्रभाव कन्नै मंजूर करी लैता ऐ।

<><><><><><>

Parliament-Bill

सरकार कल लोकसभा च लोक परीक्षाएं च गलत साधनें पर रोक सरबंधी तरमीमी बिल-2026  
पेश करग। एह विधेयक संगारें लेई लोकसभा दी कार्यसूचि च शामिल ऐ। केंद्री मंत्री डा. जितेंद्र  
सिंह इस विधेयक गी सदन च पेश करडन। एहदा उद्देश्य लोक परीक्षा च गलत साधनें पर  
रोक सरबंधि बिल-2024 च तरमीम करना ऐ।

शुक्रवारें केंद्री मंत्रिमंडल नै क्वस्चन पेपर लीक ते मतेयानें च गलत तरीके दे इस्तेमाल दे मामले च तुरत सुनवाई लेई फास्ट ट्रैक अदालतें दी स्थापना ते दोषिणं लेई होर मती सख्त सजा दी बवस्था करने सरबन्धी मसौदे गी मंजूरी दिती ही।

<><><><><><>

#### Draft Bill

NEET ते होरनें प्रतिभागी मतेहानें दे पेपर लीक होने दिएं घटनाएं गी रोकने लेई केन्द्री मंत्रिमंडल नै इक सख्त कनून दे मसौदे गी मंजूरी देई दिती दी ऐ। प्रधानमंत्री नरेन्द्र मोदी हुंदी अध्यक्षता च होई दी केन्द्री मंत्रिमंडल दी बैठका च लोक परीक्षा तरमीमी बिल 2026 दे मसौदे गी पास करी दिता गेआ ऐ हा। इस नमें प्रस्तावित कनून दिएं प्रमुख गल्लें च फास्ट ट्रैक अदालतें दा गठन करना- सख्त सजा ते भारी जुर्माना- विशेष कार्यबल आसेआ जांच जनेह मुख नुख्ते रखे गेन। इस कनून च ऐसे मामले दी सुनवाई 3 महीने दे अंदर-अंदर पूरी करने- कसूरवारें गी घट्टो-घट्ट 7 कोला 10 बरे दी जेल दी सजा ते 10 करोड़ रपे तगर जुर्माना लाने दी पेशकश कीती गेदी ऐ। ऐसे मामले दी जांच लेई विशेष कार्यबलें गी अपनी तफतीश दा कम्म 2 महीने दे अंदर-अंदर मुकम्मल करना होग। कैबिनेट दी मंजूरी थोई जाने दे बाद सरकार इस विधेयक गी अगले हफ्ते संसद च पेश करी सकदी ऐ।

<><><><><><>

#### Murmu-Return

राष्ट्रपति द्रौपदी मुर्मू मोल्दोवा, उत्तर मैसेडोनिया ते रोमानिया दी सरकारी जातरा सम्पन्न करियै अज्ज बड्डलै नमीं दिल्ली परतोई आइयां न। जातरा दे दरान राष्ट्रपति होरें त्रोंनै मुखें दे राष्ट्र अध्यक्ष कन्नै डेलीगेशन स्तरै दी गल्लबात कीती ते दपकखी सरबन्धें गी मजबूत बनाने दे कन्नोकन्नी बपार, शिक्षा, डिजिटल, तकनीकें, नमिणं काहडें ते नवीकरणी उर्जा जनेह खेतरे च सहयोग बधाने पर चर्चा कीती।

एह मोल्दोवा ते उत्तर मैसेडोनिया दी कुसै भारती राष्ट्रपति हुंदी पैहली-पैहली सरकारी जातरा ही जिसले के रोमानिया दी त्रै दाहकें शा मते समें दे बाद कुसै भारती राष्ट्रपति हुंदी एह पैहली सरकारी जातरा रेई।

<><><><><><>

#### PM-MKB

प्रधानमंत्री नरेन्द्र मोदी होर अज्ज बड़लै 11 बजे आकाशवाणी पर प्रसारित होने आहले महावार कार्यक्रम “मन की बात” राएं देश-विदेश दे लोकें कन्नै अपने विचार-सांझे करडन। हर महीने दे खीरी ऐतवार गी प्रसार होने आहले इस कार्यक्रम दी एह 136मी किशत होग। कार्यक्रम दा प्रसारण आकाशवाणी ते दूरदर्शन दे समूलचे नैटवर्क ए.आई.आर. न्यूज वेबसाईट ते न्यूज ऑन ए.आई.आर. Mobile App- डी.डी. न्यूज- प्रधानमंत्री हुंदे दफ्तर ते सूचना ते प्रसारण मंत्रालय दे यू-ट्यूब चैनलें पर बी होग। हिंदी प्रसारण दे तुरत मगरा एहदा डोगरी भाषा च अनुवाद प्रसारित कीता जाहग।

<><><><><><>

#### Kargil Vijay Diwas

अज्ज मुख्य भरै च लोक 1999 दे कारगिल युद्ध दरान अपनी जिंदू दी आहूति देने आहले भारती जवानें दी बहादुरी गी सम्मान देने लेई कारगिल विजय दिवस मना'रदे न। एह धयड़ा कारगिल युद्ध च पाकिस्तान पर भारत दी जित ते आपरेशन विजय दे कामयाबी कन्नै खतम होने दी 27मीं बरे गंड दा प्रतीक ऐ। इस अभियान दरान भारती थेआर बंद बलें जम्मू-कश्मीर दे कारगिल जिले दे उनें इलाकें गी परतियै अपने कब्जे च लेई लैता जित्थे पाकिस्तानी सैनिकें ते आतंकवादिएं अपने कब्जे च लेई लैते दे हे।

तोआई, उपराज्यपाल मनोज सिन्हा होरें अज्ज कारगिल युद्ध दे बहादुर जवानें गी श्रद्धंजलि दिती। अपने स्नेह च उनें शहीदें गी सलाम कीता जिनें देसै दी सम्प्रभुता ते सम्मान दी राखी लेई सर्वोच्च बलिदान दिता।

<><><><><><>

#### Squash

भारत दे युवा स्क्वाश खडारन अनाहत सिंह नै कनाडा च आयोजित विश्व स्क्वाश जूनियर चैंपियनशिप 2026 दे महिलाएं दे इक्कले-इक्कले मकाबले दा खताब जित्तियै नमा रिकार्ड कायम कीता ऐ। इस जित दे कन्ने गै अनाहत जूनियर विश्व खताब जितने आहली पैहली भारती स्क्वाश खडारन बनी गई ऐ। उनें मिस्र दे खडारिण दे 16 बरें दे वर्चस्व गी खत्म करदे होई भारत लेई सुन्ने दा तगमा जित्तियै मुल्खै दा मान बाधाया ऐ।

<><><><><><>

#### FIH Sub Junior

भारती सब जूनियर मर्दे दी हाकी टीम नै एफ.आई.एच यूथ हाकी 5-5 एशियाई चैंपियन च शानदार प्रदर्शन करदे होई फाइनल च पाकिस्तान गी 3-1 कन्ने हराइयै सुन्ने दा तगमा हासल कीता ऐ। ओमान दे मस्कट च आयोजित इस टूर्नामेंट च भारत नै खताबी मकाबले च अपने रिवायती हरीफ पाकिस्तान गी 3-1 कन्ने हराया। तोआई, इस चैंपियनशिप च भारत दी महिला टीम नै कजाकिस्तान गी हराइयै चांदी दा तगमा जिती लैता ऐ।

<><><><><><>

#### Weather

मौसम विभाग नै अज्ज मध्य महाराष्ट्र ते ओडिशा च मौलेधार बरखा दा रेड अलर्ट जारी कीते दा ऐ। छत्तीसगढ़, गुजरात, कोंकण ते गोवा च कल्लै तगर भारी बरखा दे इमकान न।

तटीय आंध्र प्रदेश, पूर्वी मध्य प्रदेश, पच्छिम बंगाल दे गंगा कन्नै लगदे इलाकें ते हिमाचल प्रदेश च बी अज्ज तेज बरखा बरने दे असार न। जम्मू-कश्मीर, लद्दाख, झारखंड, उत्तराखंड, पच्छिमी राजस्थान ते उत्तर पूर्वी भारत दे किश हिस्से च बी इसै चाल्ली दा मौसम बने रोहने दे इमकान दस्से गेदे न।

<><><><><><>